

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



إِلَهَ الْأَلَاءِ مُحَمَّدٌ رَسُولُ اللَّهِ

KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

26 Avril 2019

19 Shabaan 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

LA TERRE EN DANGER!

Au commencement de la semaine le 22 avril 2019 ti ena la Journée internationale de la Terre ki commémore la Terre et tous bane richesses ki li fine apporte nous par la grâce immense d'Allah (twa). Sa faire nous rappel ki la Terre en danger et ki nous, tous bane dimounes, bane humains, nous ena le devoir absolu pou protèze sa le monde là, sakaine à so niveau !

En effet, la nature li ene don ki Allah fine donner à l'humanité pour permette à sak dimoune pou vive ene la vie de contentement, ene la vie prospère et paizable. Mais selman, bane dimounes, bane nations fine vine gourmand pou accumule bane richesses par tous bane moyens, et avec sa, zot fine consomme plisse ki bizin bane ressources de sa la Terre là, kot zot fine faire gaspillaze lor gaspillaze, et tout sa fine empêche zot fer ene bon uzage de bane ressources naturelles gratuits ki à zot disposition et alor zot fine mette l'humanité dans la situation ki li trouve li azordi zour.

Azordi zour bane dimounes trouve zot dans ene situation bien critique. Zamais auparavant l'humanité fine trouve li dans ene position aussi délica et

inconfortable, et bane dimounes dans so l'ensemble, zot ena bane doutes et incertitude concernant le future. Bane calamités couma bane inondations, la sécheresse, bane tsunamis, tremblements de terre, bane tornades, bane incendies, la fumée...

Couma Lundi le 15 Avril 2019 dans Paris kot ene parti d'ene de bane plus vieux cathédrale de La France et du monde, Notre Dame de Paris fine brûler dans bane incendies. La France et le monde Chrétien en générale pendant zot carême de Pâques fine trouve ene de zot plus grand symbole brûler dans la flamme.

... Ena aussi chaleur et fraissaire intense dans tous bane coins du monde et kot zot produire même hors saisons et dans bane l'endroits inattendu, kot tous sa là laisse le monde en état de choque. Bane tels catastrophes, d'ene telle dimension, d'ene telle intensité zamais fine produire avant. Bane experts affirmer ki bane tels changements (c'est-à-dire, le changement climatique), ki provoqué par dimounes même, fine détruire la couche d'ozone ki pé protège nous la Terre, provoquant ainsi le réchauffement de nous lé monde et kot sa entraîne plusieurs bane les autres calamités.

Sa bane calamités là, couma dimounes dire, calamités naturelles zot transformer en bane avertissements divines kot Allah servi sa pou sakouye bane dimounes et fer zot prend conscience de zot bane erreurs afin ki zot capave change zot la vie et quitte le mauvais chemin ki Shaytan ti montrer zot et ki zot ti pé suivre, et ki alors au lieu de sa zot adopter ene mode de vie juste, ene la vie de réforme.

Allah (twa) dire dans Quran Shareef:

« Calamités fine paraîte lor la terre et dans la mer ; bane actions dimounes même fine mérite sa, et Li (Allah) fine fer zot goûte (conséquences) ene partie zot propre actions. Peut-être zot va retourne (dans le bon chemin). » (Al-Rum 30: 42).

Zot tous conscient ki bane rejets excessifs de carbone et de bane les autres substances toxiques dans l'atmosphère, ki ene conséquence de l'industrialisation ki grandi rapidement pour créer richesse, et aussi l'utilisation abusif de bane z'armes offensifs ena ene l'effet destructeur lor la couche d'ozone, kot sa entraîne ene augmentation dans température, et kot sa faire bane icebergs fonne et le

climat en général li changer de façon extrême. Tous dimounes accepter sa fait scientifique là et zot conscient ki si sa bane états des choses là persister, alors nous lémonde pas pou tarder pou alle vers destruction et kot alors pou népli ena bane habitations. En d'autres mots, nous pé dirige nous directement vers la fin du monde.

Malgré sa vérité bien flagrant (clair) et alarmant là, et malgré ki tous les jours ena plusieurs bane conférences internationales ki ena lieu, bane ki ena le destin de sa le monde là dans zot la mains zot pé contigner fer zot tėti et zot pas ouler faire assez bane concessions pour sauve zot l'âmes, ainsi ki l'âmes de tous bane dimounes. Zot fine aveugler par l'idée pou préserve et étendre la souveraineté, pou créer bane richesses, pou accapare autant de bane ressources naturelles ki zot capave, par n'importe ki moyens ki zot oulé, et zot pas pé gagne tracas ki pou arrive nous bane zenfants de demain. Zot prépare zot à sak reprise pou faire ene uzage excessif de bane l'énergie fossile et pou dépense sans aucaine scrupule dans la course à bane z'armes, bane engins de guerre sophistiqués et bane z'armes destructives et zot alle touye sans aucaine remords bane dimounes couma zot-même...

Pareil couma récemment pendant Pâques – dimanche le 21 Avril 2019 – dans Sri Lanka, fine ena ene attentat meurtrier, ene série l'explosion dans 3 l'églises et 4 l'hôtels haut-de-gammes de Sri Lanka ki fine faire plisse ki 350 morts et des centaines de blessés.

Bane là ti pé célébrer la messe de Pâques dans sa bane l'églises là. L'église Saint-Anthony de Colombo et l'église de Saint-Sébastien de Negombo, ene localité au Nord de la capitale. Ena ene troisième l'église dans l'est du pays. Beaucoup fine blessé ; plisse ki 254 dimounes fine admette à l'hôpital à Colombo et 60 blessés dans deux attaques hors de la capitale. Selon bane sources, 64 dimounes fine périr à Colombo et 3 l'hôtels de luxes et 1 l'église fine frappé. Et là-dans ena 35 étrangers fine trouve la mort.

Le Premier Ministre Sri Lankais Ranil Wickremesinghe fine condamne sa l'attaque là comme lâche et fine conseil bane peuples Sri-Lankais reste uni et pour prend mesures immédiats contre sa bane malfaiteurs là.

Nous pas conner exactement ki sanlà fine faire sa bane l'attaques là mais si couma bane là pé proclamer ki c'est bane Towheeth Jamaat ki fine faire sa bane l'attaque, alors sa li bien condamnable en Islam, et zot fine présente ene bien mauvais l'image pou l'islam. Pareil couma mo fine dire dans mo bane séries de Khutba Jummah là lor sa sujet là, sa c'est pas saki l'islam prêcher. Zot pé pluto donne ene mauvais nom à l'islam. En tous les cas, **JAMAAT UL SAHIH AL ISLAM condamne sa bane l'attaque là.**

... et sa bane kalité dimounes ki servi bane z'armes là pou zot propre gain personnels zot pas rende zot compte ki bane ressources aussi importants ti capave servi pour aide bane sans-abri, bane ki morts de faim et bane opprimés. Mais ki pé prend tracas de sa l'état des choses là ? Bien tiguittte dimounes en tous les cas !

L'homme oublier so propre l'âme et celui de bane les autres dans la course pou gagne pouvoir. L'homme ti bizin humain, li ti bizin ena *Rehem* (pitié) pour so bane semblables. Sa c'est la base de so création, kot li supposer adore ene sel Dieu Tout-Puissant (Allah), le Dieu Unique et ki ena tout pouvoir et li pas ti bizin donne aucaine associé à Allah dans So l'adoration. D'ailleurs Allah fine créer li pou ki li ena pitié, pou ki li ena l'empatie pour toute la race humaine. Mais dans so lécourse pour gagne pouvoir, avec so gourmandise pou gagne plisse l'argent et pou grimpe l'échelle du succès matériel, li fine accepté vende so l'âme avec Shaytane pou ene prix dérisoire! Li accepter rode gagne sa le monde temporaire là et pou abandonne le monde ki pou pli bon et éternel pou li, et alors dans so empressement pou gagne liberté pou alle vers la réussite matériel, li accepter écrase bane dimounes couma li, kot li oublier ki sa bane dimounes là zot aussi zot bane humains et ki zot ena même disang dans zot la veines.

De ce fait, l'injustice, crime, fraude et la corruption de toutes sortes fine faire zot l'apparition lor la scène de sa le monde là. La Terre fine vine témoin de so propre destruction.

L'histoire de la religion fine montrer ki, sak fois ki l'injustice et l'immoralité fine prévaloir, la justice d'Allah fine vine corrige tous bane kitchoses kot Allah (à travers So bane Messagers et Prophètes) fine lance zot bane avertissements bien clairs. Allah ouler ki l'homme réaliser ki li pas ena aucaine contrôle lors la nature. Li pas capave faire bane kitchoses ki pou faire bane innocents soufferts d'après so

bane désirs et caprices. Tout l'injustice ki faire lor l'humanité bizin prise en compte. Tous bane signes d'Allah zot bane messages d'avertissement à l'homme pour permette li pou prend bane mesures correctives avant ki le pire produire. Le changement climatique ensam avec réchauffement climatique et bane catastrophes naturelles zot ene message, ene signe.

Le temps fine vini pour ki le monde réveiller, kot li prend conscience de saki pé passer, et li change d'attitude, li change so mentalité et li penser de façon globale (li pense à toute l'humanité). La religion, en particulier le mode de vie parfait ki l'islam représenter, ena ene rôle important pou zouer pour transforme l'état égoïste de l'homme concernant la cupidité (soif l'argent) et pou transforme sa en ene générosité sincère. Vrai la foi dans Allah et dans la préservation de l'humanité bizin vine la force principale pour la protection de l'environnement, pour la justice sociale et l'équité et la recherche d'ene société plus humain.

Bane vraies croyances religieuses et la confiance en le Dieu Unique (Allah) tousel pou capave ena ene l'impact important lors la conversion de bane dimounes ki ena lé cœurs dures et faire zot vine bane sauveurs de bane générations futures. Et le meilleur modèle ki fine montré nous tout sa c'est le Saint Prophète de l'Islam, Hazrat Muhammad (saws). Beaucoup bane les autres grands dimounes fine également honore sa le monde là avec zot présence et zot fine également montré le chemin vers Allah (twa) et la préservation de bane liens de fraternité entre bane dimounes, afin pou permette sakaine d'entre nous pou senti nous connectés et ressenti la pitié les z'uns envers les autres.

Le jour kan bane dimounes (la race humaine) pou réaliser ki li pou être responsable de tous so bane actions devant Allah (twa), alors sa pou aide li pou réduire radicalement tous bane l'injustices et l'immoralité, et le Créateur Qui ena ene contrôle absolu lors l'univers en entier pou incite nous sûrement pou trouve bane nouvo solutions pour réduire bane l'effets du changement climatique et du réchauffement de la Terre pareil couma Li ti montrer nous So bane miracles et signes extraordinaires au temps de So bane prophètes élus et kot Li fine guide zot, ainsi ki zot bane disciples, vers la victoire dans la foi et dans l'humanité.

Li donc le devoir de sak dimoune pou apporte so contribution à la protection de sa le monde là en créant ene l'environnement ki respectueux de la nature et ene société plus responsable et tolérant. La religion, en particulier l'islam et bane

musulmans, capave apporte ene contribution considérable à sa grand travail là et donne au monde ene aperçu du sens véritable de la vie ki ti révélé dans tous bane siècles à tous bane prophètes bien-aimés d'Allah et pou suivre zot bane directives pour ene la vie meilleure, que ce soit au niveau physique, moral et spirituel. Kan nous l'intérieur pou réformé, nous perception du monde pou évoluer de façon positif et nous pou mieux placé pour aide le monde pou progresser à grand pas jusqu'à nous dernier souffle lors la terre et jusqu'à saki Allah (twa) rappelle nous tous vers Li.

Ki Allah aide l'humanité pou prend conscience de la situation difficile dans quoi li trouve li azordi jours et pou prend bane grands mesures pour assure l'avenir de sa lé monde là et la vie des milliards de bane dimounes dans le monde. *Insha-Allah, Ameen.*